

四庫全書

史部

欽定四庫全書

平定準噶爾方略續編卷三

乾隆二十五年五月辛酉

諭哈密辦事布政使銜永寧查奏辦送回使章程

上諭軍機大臣曰昨據永寧奏拔達克山入覲使人
至哈密時將賞賜物件照例給與駝隻其自行購
辦者以並無官辦之例曉示代為催覓馱載前往
等語現在辦理回使雖業已起程但伊等所得賞

賜官為辦送若干伊等自置物件數目及催覓馱載若干俱未分晰奏聞著再行查明具奏此次拔達克山既定有章程將來哈薩克布魯特等處使人回時俱可循照辦理

壬戌

恩免索倫等處官兵應賠軍器

軍機大臣奏言黑龍江將軍綽爾多奏稱索倫等處官兵五百一十七名所有損壞軍器請照

數製給其價值銀兩即於各該官兵應得俸餉
內分作三年扣還等語應如所奏辦理奏入
上諭曰年來索倫等處官兵在軍營行走甚屬奮勉
所有損壞軍器著照數造給不必令其賠補但此
次係格外加恩未便援以為例著傳諭該將軍等
曉示官兵加意愛惜軍器毋得任意損壞

丙寅

命各處駐劄大臣通查未經議卹陣亡人等並前次

隨從布政使銜德舒官兵一體補行議卹

上諭軍機大臣曰年來有事西陲凡陣亡官兵俱經加恩議卹但大兵各路進剿屢次攻戰其中或有被賊傷害因衆人未經目擊疑為尚留賊地者今新疆平定此等迷失之人既未查獲即係陣亡伊等為國捐軀又復隱沒不彰殊堪憫惻著交各該處駐劄大臣通行查核若有前經陣亡未行具報或止報未曾脫出者具令詳查具奏候朕酌量加

恩又

諭曰從前德舒領兵搜捕嗎哈沁被賊傷害已加恩將德舒照陣亡例議卹其隨行各官兵有受傷及身死者著交部一體照例議卹

議定核減北路臺站馬駝事宜

軍機大臣奏言臣等遵

旨核減北路軍臺馬駝查張家口外自第一臺至第十臺額馬各三十五匹第十一臺至第二十五

臺額馬各二十五匹其間遇有戈壁臺站額駝
各二十五隻今北路事既不繁臣等酌照舊例
將額馬三十五匹者減為二十五匹額馬二十
五匹者減為二十匹駝隻亦照數裁減其由烏
里雅蘇台至喀喇沁之喀爾喀臺站二十處每
臺額馬五十匹駝二十隻亦屬過多請於每臺
各留馬二十五匹駝十隻餘俱一例裁減所有
裁減各馬駝俱令歸入牧羣交與成衮扎布永

興等辦理奏入

上從之

議定南路馳遞事件分別緩急辦理

軍機大臣奏言陝甘總督楊應琚請將南路軍臺馳遞事件酌分緩急以惜馬力一摺奉

旨交臣等速議具奏查現在軍務告竣馳遞事件較前減少其中遇有緊要之件仍須星速馳遞該督所請分別緊急事件仍用六百里傳牌其可

以稍緩者俱用四百里傳牌之處原為愛惜馬力起見應照所請行至應填六百里四百里之外俱係尋常事件無庸一時馳遞應令稍需數日先後彙齊馳遞或此處有應遞事件適值他處報封經過亦即隨便附奏於傳牌內聲明更為簡便臣等仍不時留心察看儻各處辦事大臣有尋常四百里馳遞之件及應入尋常彙齊奏報者違例遽用六百里馳遞即行奏請議處

則各該處不敢輕動臺馬而口外一切應付亦不致周章奏入

上從之

辦理總督事務甘肅巡撫吳達善疏奏解送巴里坤牧放馬匹全數出關

吳達善奏言督臣楊應琚奏請於安西甘肅等處提鎮標營撥馬三千匹解赴巴里坤牧放備用臣承准

廷議陸續動撥所有安西提標馬四百匹肅州鎮
標馬六百匹西寧鎮標馬六百匹甘州提標馬
七百匹涼州鎮標馬七百匹總計三千匹又於
莊浪滿營撥馬三百匹作為餘馬俱於五月十
四日以前出關至橋灣中路合羣於草地隨牧
隨行令副將達啟叅將書隆阿督同各解負沿
途照料交辦事道負同德查收牧放備用奏入
報

聞

已已

諭叅贊大臣舒赫德核定回部各城官制職掌事宜
上諭軍機大臣曰前因漠咱吧爾來京曾經詢問葉
爾羌喀什噶爾等處所有阿奇木伊沙噶伯克名
目及各該員所管事務今質之霍集斯其所奏與
漠咱吧爾核對多屬不符此蓋伊等各就所記憶
為言原無足怪今將錄出名單交與舒赫德著將

欽定四庫全書

卷三

現在官名職掌逐一查詢核對如有遺漏錯悞者
即行改正具奏

庚午

哈薩克阿布勒瑪木比特使人瑚圖拜阿塔賚
阿布賚使人額勒斯瑚勒阿布勒比斯使人伯
克奈布魯特哈木巴巴使人玉森等至京

上幸同樂園

召見使人等行禮畢

親加慰問奏對訖

賜茶果筵宴

賜哈薩克阿布勒瑪木比特阿布賚等

勅書

奉

天承運

皇帝勅諭哈薩克阿布勒瑪木比特阿布賚阿布勒

比斯哈木巴巴等爾等遣請朕安之瑚圖拜阿塔

賚等由駐劄烏魯木齊大臣護送來京朕召見奏對後加恩宴賚賜爾等蟒錦緞疋紬綾器物若干其各祇受又賜來使等頂翎冠服朝珠銀緞器物各有差仍俾護歸游牧據爾等使人奏稱厄魯特之地現俱閒曠今阿布勒比斯屬人唐古塔爾現在巴爾魯克納喇巴圖在特穆爾綽爾郭哈爾克勒部落屬人額森克勒德卓羅木巴特在塔爾巴噶台圖魯木拜屬人扎喇勒噶布在阿勒坦額默

勒哈喇塔拉庫克烏蘇居住又懇朕加恩將來准
哈薩克人等至伊犁游牧等語塔爾巴噶台等處
向屬準噶爾游牧朕以大兵平定爾哈薩克及布
魯特塔什罕安集延拔達克山俱輸誠內附爾哈
薩克游牧頗屬寬廣理宜守其舊界不可妄思踰
越爾等若謂為朕臣僕便可越境游牧則布魯特
等亦皆朕臣僕各以游牧為請豈有大兵平定之
地而分給衆人之理現在伊犁等處內地官兵陸

續移往屯駐故爾阿布賚前曾懇請於塔爾巴噶
台等處游牧朕未允行今豈得遽行專擅且從前
準噶爾恃強爭奪爾等尚不敢近其邊界朕平定
伊犁始得各安生業尚不知足耶至伊犁將軍
大臣等於此等邊地不時遣兵巡察若見爾等屬
人棲止或行驅逐或竟行俘獲則反致失其生業
非朕撫恤爾等之初心也爾等內附有年諸凡恭
順或爾所屬無知之人私往游牧即當明白曉諭

令其移回故地方足以昭誠悃又來使等所奏布魯特等搶掠爾部情節其意蓋欲請兵報復朕為天下共主外藩諸部一視同仁儻不遵法紀致干罪戾者必遣兵往討若彼此小有爭鬪盜竊自當準情酌理務得其平豈可偏聽一面之詞遽興師旅昨拔達克山素勒坦沙曾擒斬逆回自効因請兵往勦隣部朕未嘗允行爾等應亦聞知且朕若發兵助爾等而布魯特復來請兵亦將與之否乎

夫盜竊之事邊界時有能彼此教戒屬人勿貪小利而傷和好斯為安生之善策耳將來布魯特有使至朕亦以此諭之再從前爾等部落貿易之人有謂內地商人貨物不佳價復昂貴未行交易者夫烏魯木齊貿易之舉特念爾部難得內地之物故招募商販遠行交易期有益爾等日用耳或商貨不能精好全備諭令善為購辦尚屬可行若價值則在交易之人因物計算貴賤隨時未便官為

減損其或彼此不願亦難以相強也至去年爾部
巴魯克巴圖魯等搶掠烏梁海爾霍集伯爾根之
姪托科洛被獲詢係隨母往探親戚非同來搶掠
之人因令使人等領回即交與伊叔仍以格外加
恩之意曉示至巴魯克巴圖魯罪應致討北路將
軍大臣即欲發兵朕以爾等恭順有年不欲以一
人而驚擾全部因遣侍衛納旺齋勅往諭爾等應
使巴魯克巴圖魯服罪將從前掠獲逐一查還尚

可曲為矜宥此時自必遵旨辦理俾納旺復命矣
爾等果能懷仁向化惟約束所部各守疆域以安
生理庶可仰承朕恩常享無窮之福特諭

辛未

諭叅贊大臣阿桂等領兵巡察邊界

上諭軍機大臣曰哈薩克使人瑚圖拜阿塔賚等奏
稱厄魯特之地現俱間曠我哈薩克人等有在塔
爾巴噶台庫克烏蘇綽爾渾巴爾魯克阿勒坦額

默勒等處駐牧者我等皆天朝臣僕懇恩准至伊
犁游牧等語從前阿布賚請於塔爾巴噶台等處
游牧曾經降旨曉諭今據來使所奏則伊等已漸
次闌入自當驅逐現在頒給勅諭不允所請著傳
諭阿桂等暫停搜捕嗎哈沁以巡察邊界為由領
兵四五百名前往塔爾巴噶台等處遇有哈薩克
人等在彼駐牧者即明切曉示云此天朝平定之
地爾頭目等從前奏請游牧大皇帝並未允行何

得擅行棲止因念爾等俱經歸附姑寬治罪可即
速遵諭遷徙伊等如果及時移出則已或有意推
諉遲延即應懾以軍威但不得遽行縱兵俘獲阿
桂一切可相機妥協辦理此行兵數不宜太少儻
不敷用即合之安泰所領兵又得四五百名可以
號稱二千其如何與安泰寄信會兵并約計休息
馬匹二十日一同起程之處俱著酌議奏聞

命議處遺失兵丁之西安領隊大員及該管營總等

上諭軍機大臣曰據嵩阿禮奏稱由阿克蘇烏什撤回之西安駐防兵一千名內兵丁塔青阿行次哈喇沙爾未回貴柱張俊復以患病逗留鹽池請將營總特克慎黑翰等交部分別嚴加議處等語特克慎等係領兵行走之員漫無稽查約束以致遺失兵丁又不報明駐劄大臣官負查緝私行尋覓無獲俱著交部嚴加議處至駐防兵丁撤回應有領隊大員嵩阿禮何以不行叅處著明白回奏仍

逐一查取職名續叅交部議處再塔青阿等隨同
大隊行走何至迷失或係乘間潛逃亦未可定著
交哈喇沙爾巴里坤駐劄大臣及甘肅巡撫嚴行
查拏兵丁善福係貴柱之壻跟役張顯係張俊之
弟委令照管乃於半途先返殊屬藐法著拏送來
京交部審明治罪

壬申

命叅贊大臣舒赫德多派回人修鑿穆素爾嶺道路

上諭軍機大臣曰舒赫德奏由穆素爾嶺行走四十餘里地多冰石相雜內有二里全係冰山滑不可行每日派回人十名鑿鑿磴道等語穆素爾嶺係往來要路既係冰堅難鑿十人之力恐不敷用舒赫德應多派回人前往專責以修治道塗冰雪之役行走人多地氣漸就和暖則凝沍自易消融將此傳諭舒赫德知之

命撥臺站裁撤兵丁屯田並賞給管臺回人鹽菜銀

兩

上諭軍機大臣曰舒赫德奏臺站所有綠旗兵丁每臺酌留五名其餘遣回本營至管臺六品頂帶回人從前未支養贍請照千總例給與鹽菜銀兩等語近因定長請撤綠旗兵丁經軍機大臣議入於開展屯田兵內不必遣回仍著遵照辦理其臺站効力回人照千總例賞給鹽菜銀兩著照所請行諭駐劄烏魯木齊副都統永瑞等查較解駝倒斃分

數咨部分別核議

上諭軍機大臣曰永瑞奏稱巴里坤解駝四百八十
六隻沿途倒斃十六隻哈密解駝五百隻倒斃四
十三隻等語兩處所解駝隻為數大略相等而倒
斃多寡懸殊則沿途官兵其留心照管與否較然
易見自應分別查核將倒斃少者議叙多者議處
庶將來解送馬駝官兵皆知所懲勸可傳諭永瑞
等即行詳查咨部辦理

六月癸酉

叅贊大臣阿里衮疏奏查辦舊和卓木墳墓事

宜

阿里衮奏言臣奉到

恩旨令派人修理看守回部舊和卓木墳墓隨宣示
各回人無不感激頂禮臣委提督董孟公木薩
等查辦據報稱回部喀什噶爾舊和卓木墳墓
原有三十帕特瑪地畝錢糧看守回人十二戶

仍照舊管理以供祭祀修葺餘為伊等養贍之
資奏入報

聞

總兵定柱容保等護送霍集斯子漠咱把爾呼
岱巴爾氏至京

命隨伊父同居

乙亥

命豁免甘省應徵耗羨

上諭大學士曰甘省乾隆二十三四兩年耗羨業經
降旨緩徵其二十五六兩年應徵耗羨該撫吳達
善奏請帶徵朕念隨征耗羨遇蠲免正供例不應
停緩但甘肅自辦理軍務以來小民急公趨事誠
樸可嘉業已疊次加恩凡屬緩徵帶徵及一切正
雜錢糧無不破格豁除以示撫綏今軍需告竣幸
遇暘雨應時秋收可望正宜益加惠養俾蒙樂利
著將該省二十五六兩年應徵耗羨概行豁免用

彰優卹編氓格外加恩之至意該部遵諭速行

丙子

命議叙叅贊大臣阿桂所領搜剿嗎哈沁官兵並

諭獎賞管理屯田回人伯克各事宜

上諭軍機大臣曰阿桂奏稱領兵搜捕嗎哈沁至阿

圭雅斯等處據侍衛喬蘇勒等於呼爾岱見有賊

蹤收獲男婦二十六名口又至都木丹濟爾哈朗

侍衛碩通等搜剿樹林賊衆收獲馬匹旋有藏匿

賊匪前來爭奪獎賞藍翎鐵柱等沿途共殺賊三十餘名得馬三百五十餘匹察哈爾署叅領策凌旺布及兵丁三名陣亡又得傷兵丁四名等語此次搜捕嗎哈沁官兵甚屬奮勉侍衛碩通前曾賜卓里克圖巴圖魯號著再賞銀一百兩喬蘇勒著賜錫勒哈達克巴圖魯號仍賞銀一百兩健銳營獎賞孔雀翎護軍校達什欣巴圖魯沙爾瑚善著授為三等侍衛侍衛上行走獎賞藍翎前鋒護軍

鐵柱著授為藍翎侍衛仍賞給孔雀翎索倫署叅
領驍騎校烏爾庫勒圖察哈爾護軍署章京扎卜
俱賞給孔雀翎健銳營前鋒護軍諾海察哈爾護
軍策凌多爾濟索倫署領催瑪塔木保三世保厄
魯特兵丁和通俱著獎賞藍翎陣亡得傷官兵俱
著造冊送部議叙議卹再烏什之噶雜納齊伯克
默特阿克蘇之都管伯克題尼阿琿阿卜都噶普
爾照看回人屯田著加恩賞給阿卜都噶普爾緞

二端伯克默特孔雀翎都管題尼藍翎至阿桂等
既經捉生詢問仍領兵與安泰同往阿勒坦特卜
什阿呼喇哈爾海搜捕搶掠布魯特馬匹賊人及
在庫車搶掠臺站戕害德舒之賊人塞卜騰霍濟
格爾等著給發孔雀翎五枝藍翎十枝以備獎賞
仍暫停搜捕嗎哈沁即巡查塔爾巴噶台驅逐哈
薩克人等又據奏此行未設臺站俟事竣奏報等
語未免聞信遲緩可傳諭舒赫德著豐納亨選派

幹負領兵二三十名前往阿桂處通信所有辦理情形阿桂即令齎回奏聞

御前侍衛署副都統安泰疏奏與叅贊大臣阿桂同抵伊犁

安泰奏言臣於三月十六日由烏魯木齊起程四月十五日至伊犁河水漲盛聞從前將軍大臣等來伊犁時曾將所造船隻埋藏臣派員覓得五隻二十日渡河至海努克聞哈什有賊人

蹤跡隨領兵往搜二十六日至喀什河見叅贊大臣阿桂云賊人已經剿殺於五月初五日已同至固勒扎奏入報

聞

丁丑

諭叅贊大臣舒赫德查核新疆租賦所入酌定屯駐官兵經費

上諭軍機大臣曰伊犁葉爾羌喀什噶爾阿克蘇庫

車等處駐兵應即計其地之所入以定章程不可致煩內地民力今各該處約有滿洲綠旗官兵若干屯田收穫及回人等一年所納貢賦若干足敷官兵俸餉與否可傳諭舒赫德查核具奏今年屯田收穫回人貢賦未免不齊官兵等自不敷用來年經理就緒公私租稅全行輸納則經費即可從此核定并著預為酌議奏聞

諭陝甘總督楊應琚等核計用兵後減省經費分數

上諭軍機大臣曰伊犁等處屯田收穫糧石及回人所納稅糧約計足供屯駐官兵若干人之用現諭舒赫德令其詳查具奏至甘省經費有較從前未用兵時不惟不加多且更為減省者即如從前黃廷桂以綠旗兵借支銀兩動至數十萬一時難於扣還因奏請以兵丁缺額名糧抵補行之數年昨歲據楊應琚奏稱業有成效將來扣清後兵丁缺額自不必再補是此項名糧較未用兵前已多減

省且甘省各營缺額馬匹若由內地購補收槽飼
秣其費自多今各營額馬除足數應用外既可不
必汲汲購補而屯田所用馬匹現又取給於哈薩
克其價值較之甘省購辦已屬懸殊兼就水草牧
放更非內地飼秣需用芻豆可比則馬匹一項較
前更大有減省合此數者前後通計則軍興數年
所費雖繁而將來該省經費日就減省是疆土既
經增拓而財用仍可不致虛糜著傳諭楊應琚吳

達善令其將此數項減省之處通行核計所用銀兩較未用兵以前約餘若干或現在辦理伊始所省尚少將來行之既久自必漸次增多此時亦可預行核計詳悉具奏

戊寅

叅贊大臣阿桂解送伯克霍集斯前遣通信伊兄阿卜都瓜卜反告知逆賊霍集占之額敏都管霍什提卜至京

命分別發遣廣東福建賞給駐防官兵

辛巳

諭叅贊大臣舒赫德等酌量移駐辦事大臣及安插厄魯特兵丁事宜

上諭軍機大臣曰從前用兵回部自哈密巴里坤以外如闡展哈喇沙爾等處俱駐劄辦事大臣官兵等今軍務告竣自當酌量移駐闡展水草與屯田種植俱屬平常現在烏魯木齊與哈薩克貿易彼

處係通伊犁大道若調闡展辦事之副都統定長
往烏魯木齊同安泰承辦屯牧貿易等事應有裨
益若闡展則不過與衝繁臺站相等酌派官兵管
理足矣至哈喇沙爾地亦狹小不必駐劄辦事大
臣惟近有安插之多倫回人亦需照管應於書山
和其衷二人內酌派一人駐劄一人前往阿克蘇
協同舒赫德辦事則烏魯木齊伊犁阿克蘇三處
勢如犄角而哈密巴里坤已成內地布置聯絡聲

息相通著傳諭舒赫德等詳悉籌議具奏再吳達
善奏稱甘省留養之厄魯特共一百七十餘名請
送往熱河安插等語殊不知此等厄魯特與達什
達瓦之人不同若分派烏魯木齊阿克蘇葉爾羌
伊犁等處安插令其牧放馬匹尚可得力已諭吳
達善仍行養贍舒赫德亦酌量如何分派各城安
插一面定議具奏即行文甘肅調取至差遣厄魯
特等或有厭惡任情諸事刻薄不加體卹者或有

慮其逃走優柔籠絡致令驕縱者皆未合理惟在誠心教導賞罰嚴明不為姑息亦不事操切伊等亦人耳自必共知勸懲奮勉行走併著加意辦理諭巴里坤辦事侍郎五吉等設廠牧馬事宜

上諭軍機大臣曰據五吉等奏將定長送馬一百二十餘匹交齊大勇等牧放俟秋季烏魯木齊送馬數多再請旨設立牧廠等語從前定長奏送此項馬匹時經軍機大臣議以馬匹甚少暫歸巴里坤

舊有馬廠內牧養俟秋季馬多另議添設今烏魯木齊既移駐大員則秋季所得哈薩克馬匹亦不必送至巴里坤即於本處酌量設廠斯時有安泰帶回之索倫察哈爾兵令其用心牧養此項已送巴里坤馬匹即於臺站預備應用併傳諭永瑞等知之

叅贊大臣阿里衮解送隨從霍集占住拔達克山復逃至葉爾羌之回人和濟斯和占至京

命發往廣東賞給駐防官兵

癸未

諭巴里坤辦事侍郎五吉辦送阿克蘇駝隻騾頭各

事宜

上諭軍機大臣曰舒赫德奏從前撤回官兵所交駝
四百隻騾三十頭由哈密送往巴里坤牧養已經
半載有餘若挑選臚壯駝三百隻併騾頭於七月
內緩程送至阿克蘇即將茶葉烟草等零星物件

約四五十觔一馱順帶前來尤為省便等語伊犁屯田陸續遣發自應預備馱載著交五吉等即照舒赫德所奏挑選馱隻并帶騾頭酌量從輕馱載五吉近日送馬方回沿途水草皆所熟悉著即自行解往併諭舒赫德知之

叅贊大臣舒赫德疏奏暫派副都統伊勒圖往駐海努克事宜

舒赫德奏言五月十四日准副都統豐訥亨咨

五月初八日送馬至海努克本日即領兵一百名趨赴阿桂處留知府銜富尼漢同翼領立柱照管海努克兵丁回人等語臣以屯田伊始兵丁回人必須大員統束阿桂豐訥亨伊柱俱往搜嗎哈沁歸期未定查阿克蘇有副都統伊勒圖即令領兵五十名前往海努克暫行駐劄俟豐訥亨等與阿桂會商定議何人回駐伊勒圖再回阿克蘇若路遇阿桂咨文即行開看如已

有人轉回即無庸前往奏入報

聞

甲申

諭定邊左副將軍成袞扎布等查辦卡倫侍衛事宜
上諭軍機大臣曰成袞扎布奏駐守卡倫之護軍校
竈君保近病瘋狂因醫治不痊束縛看守給與兵
丁口糧養贍等語所辦非是凡特旨差往或有罪
遣發及身臨戰陣忽稱患病者自當查核虛實不

可遽令遣回竈君保不過以侍衛銜駐守卡倫患
病若實自可辦送來京何必留於軍營看守竈君
保著即派員送京現在軍務告竣北路卡倫已成
內地亦不必每處駐一侍衛所有應行裁撤員數
及將各員應得分例移撥伊犁等處應用事宜著
軍機大臣等查明議奏

乙酉

命以查出回人霍什克伯克產業留養本處家屬

上諭軍機大臣曰海明奏遵旨查出霍什克伯克所有和闐哈喇哈什葉爾羌沙古則里之房地人口行文舒赫德辦理等語從前霍集斯安插京城已諭將產業變價給伊幼子托克托索丕為業今霍什克伯克產業亦著照例辦理存留和闐為伊養贍老妻幼孫之用

議減撤北路卡倫侍衛事宜

軍機大臣奏言臣等查北路自奈滿明安起至

津濟里克三十三卡倫每卡倫侍衛一員又查
看水草侍衛共十二員計四十五員今軍務告
竣遵

旨酌議裁減每卡倫二處用侍衛一員末三卡倫用
侍衛一員共留十六員查看水草侍衛酌裁六
員仍留六員交與成衮扎布等將北路年滿應
換之布三泰等十九人再擇其次年深者四人
陸續遣回所餘二十二員存留應用年滿屆期

照例派員更換此次現議裁撤之侍衛等共計
二十三員照此缺數請令領侍衛內大臣揀選
人員帶領引

見遣往伊犁阿克蘇葉爾羌等處以備差遣奏入
上從之

丁亥


命現駐軍營未預凱宴之散秩大臣齊凌扎卜提督
閔相師總兵五福照領隊大臣例賞緞十二端

銀五百兩提督董孟總兵官揚寧丑達客保定
柱副都統觀音保副都統銜阿定保照例減半

賞給喀爾喀公朗衮扎卜厄魯特散秩大臣鄂

齊爾照凱宴時公衮楚克例賞緞五端銀二百

兩



平定準噶爾方略續編卷三

欽定四庫全書

史部

平定準噶爾方略續編卷六

四至

詳校官監察御史

臣孫家賢

通政使司副使

臣莫瞻菴覆勘

總校官進士

臣

朱鈐

校對官修撰

臣

戴衢亨

謄錄監生

臣

蔣知廉

欽定四庫全書

平定準噶爾方略續編卷四

乾隆二十五年六月戊子

議北路驛站馬匹事宜

軍機大臣奏言准永興呈稱現在驛站馬匹雖
與乾隆六年之數相同但冬春草枯時未免竭
蹶或仍照從前由各蒙古協助或每站酌量加
增等語查臣等前因軍務告竣驛站馬匹裁照

舊額自不必再為加增至令蒙古等協助亦恐
奉行不善多所擾累現在飛遞事件甚少卡倫
侍衛等已裁其半每當更換之期原不必一起
同行酌以二三員為一起則馬力自然寬裕請
行文兵部理藩院及定邊左副將軍等凡新舊
往來更換之侍衛及司員筆帖式領催等俱遵
照辦理奏入

上從之

辛卯

命新疆解送尋常人口沿途以次接遞

上諭軍機大臣曰據舒赫德奏阿桂安泰等收服之
嗎哈沁蒙克扎卜等四人派員解京又海明額敏
和卓等奏派原任總管舍通額等解送匠藝樂工
家口等語從前解送人口特派官兵原以關係緊
要故令從本處直送京師今蒙克扎卜及工匠等
不必派員專送嗣後遇有此等人口在葉爾羌等

處祇送至阿克蘇以至庫車哈喇沙爾吐魯番哈密安西肅州如此接遞俱各回原處至肅州時始派員解京庶新疆駐劄各員不致營求差遣以圖回京自便著傳諭各該駐劄大臣及陝甘督撫知之

議烏魯木齊牧馬事宜

陝甘總督楊應琚奏言甘省各提鎮營向來俱有孳生馬廠軍興以來屢經動撥未免參差又

有水草平常數處每多羸瘠若改撥巴里坤牧
放似屬有益奏入得

旨軍機大臣速議具奏尋議甘省各標營牧廠其水
草平常之處改撥尤為要務但巴里坤水草較
之內地固佳恐綠旗官兵不善經理現在烏魯
木齊一帶土沃草肥該處駐防及屯田官兵俱
可就近照管將來馬匹蕃息又可就近調用并
省巴里坤撥解之煩應令該督查明此項平常

牧廠馬匹現有若干趁此水草豐盛之時徑行
解往烏魯木齊擇廠牧放其分起解送各事宜
請交阿桂安泰等會同楊應琚悉心酌議辦理
具奏奏入

上諭曰依議速行但今年若徑至烏魯木齊恐屆深
秋草黃之候即於巴里坤過冬亦可併傳諭知之

丁酉

命都統侍郎海明赴喀什噶爾辦事

上諭軍機大臣曰據阿里衮奏伊親赴喀什噶爾巡察卡倫將地非衝要之處所設兵丁酌量存留餘俱調往烏什又將綠旗兵四十名撤回更換索倫兵二十名等語前諭阿里衮不必赴喀什噶爾即行回京但喀什噶爾係布魯特安集延等處要路必須大員彈壓新柱至葉爾羌時海明即赴喀什噶爾辦事

命以逃犯阿卜都拉等分賞南省駐防官兵

上諭軍機大臣曰阿里衮奏稱從霍罕逃出之回人
阿卜都拉等四名曾隨霍集占行走今詳加詢問
察其戶口若干送至肅州辦理等語阿卜都拉等
情罪本應正法今已從寬免死至伊等妻子何必
更令完聚著將阿卜都拉等審訊後即賞給南省
駐防官兵為奴其妻子即未經賞人亦著查出另
行備賞

諭定邊左副將軍成衮扎布折賞烏梁海緞布事宜

上諭軍機大臣曰成衮扎布奏阿爾台之烏梁海內大臣察達克等二年以來未將所定貢賦全行交納應不准折賞緞布等語伊等歸服以來頗知實心効力朕寬其貢賦加以賞賚始稍有起色而去
年復遭哈薩克搶掠著仍賞給緞布此次出自特恩後不為例著曉示伊等知之

參贊大臣舒赫德疏奏預定來年增派屯田
人事宜

舒赫德等奏言伊犁屯田初次遣回人三百名
小麥等種未及播種來年自應多為遣往而海
努克固勒扎兩處俱派官兵屯駐亦屬有益現
因各城伯克來阿克蘇之便會議派出回人五
百戶計阿克蘇一百六十一戶烏什一百二十
戶賽里木十三戶拜十三戶庫車三十戶沙雅
爾十三戶多倫一百五十戶於來年二月辦給
籽種器具攜眷前往其行走口糧及收穫以前

食用按期接濟臣前所遣暫駐伊犁之副都統
伊勒圖至穆素爾嶺聞豐訥亨已還仍行轉回
將來遷移回人即令伊勒圖領兵照看奏入報
聞

辛丑

諭叅贊大臣舒赫德等曉示回人事宜

上諭軍機大臣曰海明等奏葉爾羌伯克等謂鄂對
不宜為阿奇木伯克懇請以額敏和卓補授隨咨

商舒赫德傳集伊沙噶阿卜都喇伊木等嚴行申飭將呈擲還等語舒赫德指示海明所辦甚是但所遞呈詞阿琿列名於前而伊沙噶噶雜納齊等皆在後阿琿乃回人內誦經識字者與準噶爾喇嘛相似從前厄魯特等不知事體聽信喇嘛致生變亂其可使回人因仍舊習著傳諭舒赫德等曉示各城回人嗣後諸事惟聽阿奇木等伯克辦理阿琿不得干與至舒赫德諳練有年於新柱海明

等務宜詳加指示不得因各有分駐之地遂生推諉併傳諭新柱海明等知之

葉爾羌辦事都統侍郎海明等疏奏已勒提部落遣使貿易情形

海明等奏言五月二十五日據裕拉克卡倫送到巴勒提貿易人等據告稱我等係頭目默默斯忒爾烏蘇完兩處遣來貿易我等兩部落相隔一河各有八千餘人西接克什米爾又西

接痕都斯坦南接哈普倫東接土伯特北接博
洛爾兩部落結姻中間亦曾爭鬪仍歸和好向
來在葉爾羌貿易今聞

天朝大兵平定回部各城是以欣悅願來歸附等語
因呈獻兩頭目書禮臣等加以撫慰查所攜貨
物無多以初次前來免其納稅并酌給口糧回
人等俱感激叩首俟貿易事竣護出卡倫奏入

報

聞

壬寅

總督管甘肅巡撫吳達善疏奏年穀順成情形
吳達善奏言甘省連年因旱歉收荷蒙

恩旨頻頒咸登祚席今歲自春徂夏雨水調勻禾苗
豐茂市糧價值日就平減其從前各災地展賑
平糶之期俱於五月停止尚有撥運糧石未經
起程者概飭停止在途者即於所到之處截留

貯倉以節運費據布政司等稟報計可節省運費銀四十餘萬兩奏入得

旨節費猶其小者所喜在吾民得免溝壑也

秋七月乙巳

授厄魯特散秩大臣鄂齊爾為內大臣並與佐領們都額木齊錫喇卜達什阿畢達各賞銀五十兩們都仍賞戴藍翎

軍機大臣奏言從前達什達瓦兄子特古斯哈

什哈有子二人其長子為沙克都爾曼濟所殺
又欲殺其次子所屬們都以己子代之今們都

入

覲臣等遵

旨詢問據稱我台吉特古斯哈什哈存日待我甚厚
伊長子莫什喇卜已死次子布圖庫巴雅爾若
再被害即致絕嗣因以己子孟庫送與沙克都
爾曼濟我即收養台吉次子遇伊犁之亂向已

里坤來投中途被克勒特人等拘禁布圖庫巴
雅爾病故時方四歲奏入報

聞

丁未

諭參贊大臣舒赫德等通飭卡倫臺站毋得疏脫賊
人

上諭軍機大臣曰舒赫德奏據穆素爾嶺臺站擒獲
嗎哈沁阿舒爾供係喀什噶爾回人幼為厄魯特

所掠轉入哈薩克今逃來伊犁聞同行之厄魯特等至和濟格爾見乘白馬二人來追是以復回等語看來此等追騎必係卡倫臺站兵丁其不行拏獲情由蓋以省解送之煩但逐出該管汛地即可了事此等陋習與明知故縱無異現在逃匿之嗎哈沁等尚自不少若聚集多人盜竊滋擾亦未可定著傳諭舒赫德阿桂即照所供逃脫處所將乘馬二人嚴行查出審擬仍通飭各卡倫臺站人等

嗣後見有嗎哈沁等即竭力追擒若但追逐出汛以致逃脫或被旁人告發或賊人於他處供出定將疎忽兵丁以軍法從事

命核減臺站馬匹加意飼秣

上諭軍機大臣曰據五吉等奏現在驛遞事件較從前甚簡請將巴里坤等處臺站各照例留馬十五匹駝四隻等語軍營事簡所設臺站馬匹自應通行核減如伊犁阿克蘇葉爾羌喀什噶爾等處俱

著酌量情形應存若干庶得專意牧放其戈壁處所作何貯備草豆飼秣不致傷損倒斃著舒赫德等會商辦理

參贊大臣舒赫德疏奏阿克蘇貿易及修城情形

舒赫德奏言五月二十七日布魯特之瑪穆特呼里及阿特巴什部落商人帶有牛羊皮張來阿克蘇貿易內有頭目塔素爾海哈什哈曾於

乾隆二十三年入

覲此次即戴

恩賞翎頂前來臣加以撫賞查布魯特等貿易係此
次初至阿克蘇而回人等又皆力耕餘地米肉
價值甚平情形喜樂再阿克蘇原有舊城在山
之麓今伯克阿琿等欲加修理并添造房屋臣
即准其照議辦理奏入報

聞

戊申

命六品以上伯克等分班入

覲

參贊大臣舒赫德奏言前經將軍兆惠等奏定

回部各城伯克分為三班輪年入

覲除第一班伯克霍集斯鄂對等業經入

覲其本年派出第二班伯克等臣與阿里袞議令行

文各城駐劄大臣造冊知會於八月初旬俱來

阿克蘇由臣處派員護送其不便紆道者派員

前往帶領今據冊送前來謹列單恭呈

御覽約八月中旬起程可於十二月抵京奏入

上諭軍機大臣曰覽舒赫德奏派入覲之葉爾羌等
城伯克名單人數頗多其間七品頂帶伯克約居
大半但新疆辦事需人且沿途行走亦殊勞費著
將應行入覲之伯克等六品以上者辦送來京其
七品人員不必前來俟伊等陞轉後再行輪班引

見著傳諭舒赫德等曉示回人知之又

諭曰前鄂對等入覲轉回曾派輔國公如松等護送
即令其帶領第二起回人來京著傳諭舒赫德如
松等到彼正屆伊等起程之期不必另派大員即
遵前旨辦理

命賞御前侍衛圖倫楚巴圖魯號

上諭軍機大臣曰圖倫楚蒙郭勒岱在軍前頗屬奮
勉圖倫楚賜號果爾勒克森巴圖魯蒙郭勒岱賜

欽定四庫全書

平定回疆方略續編

卷四

十三

號綽和木巴圖魯仍賞銀各一百兩

已酉

葉爾羌辦事都統侍郎海明等疏奏賊匪搶掠

臺站

海明等奏言六月初十日據喀什噶爾之庫勒

塔里木臺站署筆帖式布占告稱初九日有回

人四十餘人步行各持木棍我與兵丁俱被擊

傷搶掠牲畜衣糧旋遇葉爾羌護送馬駝兵丁

亦稱被掠等語臣等即派副都統豐安選兵六十名前往接續臺站擒拏賊犯十一日據葉爾羌伊沙噶伯克阿卜都喇伊木等呈送回字逆書內稱呢雅斯伯克等聞阿公起程已於六月初五日起事有阿睦爾撒納遣使來告初六日已取烏什此書由牌租阿巴特送至鄂坡勒庫勒塔里木葉爾羌等語臣等查逆賊等造言惑衆現在阿里衮舒赫德處俱未有信息又選兵

五十名令藍翎侍衛富柱等策應豐安偵探情
形一面備辦官兵馬駝臣額敏和卓派親信護
衛等傳知英噶薩爾加意防範并撫慰布魯特
等臣等又劄行和闐總兵卅達一體防範仍一
面知會舒赫德等奏入

上諭軍機大臣曰海明等奏逆回搶掠臺站情形回
部甫經平定人心易搖或本處不逞之徒倡言煽
惑或去年勦賊時脫逃餘黨乘間窺伺俱未可定

雖非大事不可不痛加懲創以遏亂萌著傳諭舒赫德若喀什噶爾無事則不過賊匪流言或有變動自必派兵辦理舒赫德即領兵一二千名相機勦捕此等賊人恐有厄魯特在內倘逃往伊犁著阿桂就近堵勦至逆書所言由牌租阿巴特發行若果係此處回人務宜全行勦滅再臺站官兵等於無事時任意擾累回人有事又不能擒獲雖相沿陋習而該管大臣亦難辭疎忽之咎嗣後有似

此者定行嚴察治罪著通行曉諭知之

庚戌

參贊大臣舒赫德疏奏體察搶臺賊匪情形

舒赫德奏言六月十五日准葉爾羌辦事大臣
海明等咨送報明賊回搶掠臺站奏稿到臣臣
詳察情由葉爾羌喀什噶爾等處各城回人雜
處性習愚頑此等不過失業貧人妄言滋事又
有奸狡之徒乘機煽惑詭稱準夷餘孽以掩其

搶掠臺站之跡其實回人等雖善惡不齊現在
兵戈寧息欲圖生聚者居多斷不致大為搖動
即如流言六月初五日喀什噶爾已亂而初六
日阿里衮尚有遞到常行事件其為虛妄可知
臣將海明等行知奏稿毫不宣露一面密派護
軍校竈保住行文海明等將賊人言詞虛妄曉
示回衆但拏獲傳書之人此事原由即可明晰
至阿里衮現在已經辦理亦未可定俟得確實

信息即行具奏奏入

上諭軍機大臣曰舒赫德奏搶掠臺站賊人情形所見甚是但賊人既倡言煽惑且業經搶掠臺站深可痛恨自應酌量領兵辦理在造謀起事之人固不可疎縱其情尚可原者亦當安撫惟存之於心不可使衆人窺測反生僥倖至阿卜都喇伊木從前率先歸附此次呈出逆書絕無瞻顧殊屬可嘉舒赫德即查核情由應如何酌量加恩之處奏聞

請旨

癸丑

葉爾羌辦事都統侍郎海明等疏奏擒獲搶臺賊匪及喀什噶爾信息

海明等奏言六月十三日總兵揚寧報稱拜什謙回人呼圖爾莫拜等搶掠人口馬匹已領兵擒獲呈報參贊大臣阿里衮本日豐安報稱從庫勒塔里木臺站起程拏獲搶臺回人邁瑪第

敏等供出為首之奈納克和卓藏匿鄉村隨將
伊及夥黨八人并所掠婦女牛馬擒拏收獲又
英噶薩爾阿奇木伯克色梯巴勒氏喀什噶爾
提督董孟等報稱本月初七日參贊大臣阿里
衮領兵勦捕倡亂之邁喇木伯克回衆千餘勦
殺二百餘俱投降邁喇木伯克會同牌租阿巴
特之呢雅斯伯克逃去現在追捕等語又審得
奈納克和卓係聽從呢雅斯伯克等倡亂之人

即解來葉爾羌收禁入據豐安報行至鄂坡勒
臺站同伯克托克托和卓聚集鄉村回人曉諭
共擒送賊匪二十八獻出馬駝軍器訊據供稱
為首之摩羅呼圖克等七人俱逃來葉爾羌臣
等現在派員查拏其臺站官兵現據放回數人
又查獲兵役二名尸身統俟覆訊明確具奏奏
入報

聞

諭參贊大臣舒赫德等辦理賊匪事宜

上諭軍機大臣曰海明奏豐安擒獲搶臺賊匪邁瑪
第敏等據供阿里衮領兵擊敗賊衆噶什噶爾安
靜無事又英噶薩爾阿奇木伯克色梯巴勒氏呈
稱阿里衮聞邁喇木伯克等倡亂隨同喀什噶爾
安撫并領兵往牌租阿巴特查拏等語新疆回人
敢行倡亂必當痛加懲創著舒赫德等將首惡及
其家口全行正法逆黨亦皆正法其妻子分賞官

兵不必送京即已起程在途俱令解回辦理阿里
衮奉到回京諭旨不候新柱到彼即行起程雖搶
臺一事非可預料而回人等素不安靜情形豈毫
無體察是其意見不到處但聞信即回尚屬黽勉
料理所有善後事宜務須加意併傳諭海明額敏
和卓知之

甲寅

命議叙參贊大臣阿里衮等及優卹陣亡得傷官兵

阿里衮奏言臣於六月初六日奉

旨起程回京初七日自喀什噶爾起行至葉爾羌之
雅木扎爾本日據駐防玉斯屯阿喇圖什城把
總等報稱回人搶掠臺站人馬牲隻圍困城堡
又准提督董孟報稱伯克邁喇木往尋舊居之
伯什克勒木村莊並未在家隨派兵查緝於中
途遇邁喇木所屬回人七騎即行拏解惟哈三
和卓脫逃等語臣速回喀什噶爾據董孟告稱

聞商伯克邁喇木妄造阿睦爾撒納越庫庫訥
克嶺已取阿克蘇之言希圖煽惑人心肆其搶
掠等語臣即派兵查拏行至伯什克勒木附近
已有賊衆千餘排列臣率官兵八百餘名力戰
賊始入城堅守復以鎗礮攻圍是夜四鼓闖城
呼號乞命即行招撫詢據供稱邁喇木同三四
人渡河潛逃隨追獲邁喇木所屬托克托默特
瑪穆特索丕等知向牌租阿巴特一路逃走即

行尾追至克色勒河據居人云牌祖阿巴特之
阿奇木伯克呢雅斯聞邁喇木逃來遂與同行
不知所往臣分途追捕務期擒獲此次陣亡得
傷官兵及隨吐魯番公品級木薩擊賊得傷之
回人等續行查明具奏奏入

上諭軍機大臣曰阿里衮聞賊回搶掠臺站之信即
回喀什噶爾擊敗賊衆撫定回人豐安揚寧等擒
賊通信此次雖非大征戰可比但應機立辦甚屬

可嘉阿里衮著交部議叙伊子拜唐阿豐盛額著授為藍翎侍衛額敏和卓豐安揚寧木薩亦著交部議叙色梯巴勒氏托克托和卓等酌量獎賞其力戰有功及陣亡得傷官兵俱著查明報部議叙議卹又

諭曰賊匪倡亂拒捕一時即聚集千人必平日有潛相約結之處著舒赫德前往喀什噶爾嚴行查辦阿里衮仍著回京海明前往喀什噶爾新柱額敏

和卓在葉爾羌辦事俱傳諭知之

諭參贊大臣舒赫德等預防賊匪逃入布魯特

上諭軍機大臣曰阿里衮現在領兵追賊諒能擒獲
若業經脫逃必往布魯特游牧儻不窮追務獲則
回人等無所懲創且布魯特將來為逋逃之藪此
風斷不可長著舒赫德等加意追捕如已入布魯
特即遣人曉示利害令其擒獻受賞或稍有隱匿
推諉可速整兵攻其無備以振軍威不可遲疑誤

事

參贊大臣阿里衮疏奏擒獲倡亂之回人邁喇木等

阿里衮奏言臣等擊敗邁喇木所糾回衆千餘人復悉力攻城賊首黃夜於城北掘牆逃走臣即追至牌租阿巴特河正在造筏欲渡哨探官兵及克色勒布伊之阿里木伯克等告稱邁喇木會同呢雅斯逃走隨追至薩林都尋踪入布

魯特即派總管巴雅爾公木薩前追臣領兵將
布魯特出入要隘防守因提督董孟患病調總
兵揚寧等巡查堵截六月十八日巴雅爾等報
稱追至和羅木魯克見賊衆方欲會食即拏獲
邁喇木呢雅斯將其家口屬人勦殺收獲馬騾
軍器前來臣逐一審訊因呢雅斯聞多倫回人
等傳說阿睦爾撒納之信告之邁喇木適值議
派邁喇木輪班進京聞霍什克伯克等戶口俱

送京安插恐被留在內與呢雅斯商議行文搖惑人心而官兵來勦甚速隨糾集回人倉猝拒捕及攻潰潛逃投向呢雅斯呢雅斯又已將所縛兵丁二十人殺害遂與同逃供認不諱謹派官兵將邁喇木呢雅斯解京行文沿途大臣官員加意防範并錄供恭呈

御覽奏入

上諭軍機大臣曰阿里衮奏倡亂回人邁喇木呢雅

斯等俱已擒獲此次辦理迅速甚屬可嘉伊子豐
盛額著加恩授為三等侍衛次子倭盛額著授為
藍翎侍衛公品級木薩總管巴雅爾等奮勉追賊
殊為効力木薩著封公爵巴雅爾著授副都統職
銜今渠魁雖獲而逆黨多人必須擒治即如明伯
克薩罕和卓頗羅特和卓皆肆行殺掠之賊摩羅
額都色勒木執縛牌租阿巴特城兵丁摩羅色勒
木將兵丁全行戕害深可痛恨著傳諭舒赫德阿

里袞等務須窮搜盡獲以彰國憲至呢雅斯供稱
噶雜納齊邁瑪第敏見邁喇木所發逆書不肯鈐
用圖記隨往投喀什噶爾是伊並未從賊深可嘉
尚著酌量獎賞英噶薩爾之哈子沙巴伯克圖里
野和卓等接得逆書若當時即告之色梯巴勒氏
尚屬無罪或觀望欺隱則不可留於本地即拏解
來京前諭拏獲賊匪不必解京今計阿里袞派員
押解已將一月舒赫德奉旨後業已調回則已或

彼此相左即在京辦理亦可其効力各官兵仍著
阿里衮查明速奏

戊午

諭按察使銜納世通等防範多倫回衆

上諭軍機大臣曰阿里衮拏獲倡亂回人邁喇木呢
雅斯等供稱聞多倫回人傳說阿睦爾撒納來取
阿克蘇等語或多倫回人造言生事或邁喇木等
畏罪指稱俱未可定著傳諭納世通今命伊前往

哈喇沙爾辦事此時且勿宣露俟邁喇木等解京
後訊問明確果係多倫回人捏造再行查拏亦未
為遲但伊等俱新經安插之人撫綏防範甚關緊
要恐書山不能辦理故調往庫車并傳諭舒赫德
知之

命定回部伯克等犯罪解審之例

上諭軍機大臣曰昨諭將倡亂回人邁喇木呢雅斯
等在本處正法又因業經解送即著來京審結今

思回部辦事伯克等俱係頭目若一面具奏即於該處正法則造言生事之徒轉謂駐劄大臣等激變又殺之以滅口且將來大臣等亦不能保其竟無擾累甚有關係嗣後回部伯克身犯重罪除持械拒捕臨陣勦殺外若已經拏獲不可即行正法四品以上著拏送來京五品以下審明具奏請旨著傳諭駐劄各大臣知之

諭參贊大臣舒赫德等停止購辦回人美玉

上諭軍機大臣曰海明奏稱葉爾羌伯克等採玉呈獻揀選送京并請諭和闐伯克有獻美王者賞給緞疋等語朕命大臣等駐劄回城原以鎮撫新疆綏徠初附至揀選玉石何關緊要舒赫德尚知此意著傳諭伊等嗣後除舊例照常貢玉外回人等有求售及來獻者酌給價值不可傳知回衆令其採辦至大臣等果能實心辦事自必優加恩遇若辦事平常雖購得美玉亦復何益伊等知此庶識

事體之輕重矣

辛酉

諭定邊左副將軍成衮扎布等辦理防範卡倫

上諭軍機大臣曰成衮扎布等奏稱布延圖卡倫虛
銜藍翎伯吉呈報聞特楞古特人等搶掠烏梁海
內大臣察達克等已領兵迎敵隨派福祿領兵二
百名防範卡倫等語哈薩克特楞古特烏梁海等
互相盜竊事所時有未必有大隊前來若果有之

亦非察達克等所能禦但喀爾喀等每易於傳說
驚疑著傳諭成衮扎布惟宜密為辦理仍通飭各
卡倫嚴加防範并派員巡查不可疏懈

諭參贊大臣舒赫德等查勘布魯特游牧事宜

上諭軍機大臣曰豐訥亨奏稱烏爾圖布拉克卡倫
拏獲嗎哈沁供稱布魯特一千餘戶移來阿特巴
什居住詢之厄魯特藍翎侍衛塞卜騰據稱阿特
巴什原係厄魯特游牧等語準噶爾蕩平凡有舊

游牧皆我版圖布魯特曾經歸附豈可妄行踰越
即應體察驅逐但現在問之霍集斯又云原係布
魯特之地為準噶爾所侵大兵平定之後布魯特
等已移居三四年等語自應查勘明確若果係準
噶爾故地則在所必取非可以空言曉示遂能驅
逐者此時且佯為不知待來年添駐兵丁回人再
行相機辦理其或此地原非準噶爾所有又在特
穆爾圖淖爾及巴勒琿嶺之外自當聽其游牧即

係準部之地而遠處邊末與我界不相聯附者亦不必張皇遣兵驅逐著傳諭舒赫德阿桂等知之
參贊大臣舒赫德疏奏辦送添派屯田回人

舒赫德奏言臣前奏添派回人三百名於七月初送往伊犁本月初一日辦送阿克蘇回人起程初五日在海里巴特齊集副都統伊勒圖所領滿洲兵一百名索倫察哈爾厄魯特等兵一百名製備軍裝又每城派出伯克一名護送回

人其伊勒圖係總辦兵丁臺站仍以敏珠爾揚
桑阿協辦此次所領兵丁至伊犁後仍緩行轉
回阿克蘇俟來春再送添派屯田回人計現在
用馬三百餘匹駝一百二十餘隻羊八千三百
六十餘隻官兵鹽菜銀五千兩又阿桂調取來
年大小麥籽種一百五十石及成造碾磨之鐵
器一併發往再前往伊犁一切情形臣若俟呈
報到日恐奏事稍遲即令伊勒圖自行具奏奏

入報

聞

平定準噶爾方略續編卷四

欽定四庫全書

平定準噶爾方略續編卷五

乾隆二十五年秋七月丙寅

諭參贊大臣舒赫德等查辦聚衆搶掠回人以示懲

誡

上諭軍機大臣曰據永慶奏稱有喀什噶爾所屬阿喇古卡倫佐領羅頗里等被阿喇古村回人喀喇和卓聚衆三百餘搶掠隨經脫出又遇回人二百

餘圍守三晝夜領催格尼德未經脫出馬甲遜濟勒圖輝布爾賽卓巴圖爾奎蘇木保卓哈六人陣亡賊仍急追奮力相拒始至烏什等語此等回人肆行滋擾其中必有渠魁為之謀主舒赫德等務將倡亂之人盡行弋獲嚴加辦理俾衆知懲誠從前厄魯特等虐使回人乃染其習氣轉相倣效大抵回人等威之則懼撫之則驕不可徒事姑息此次阿里衮所辦甚妥但現在來京海明旣視為大

事心存恒法而舒赫德又若為無事意在消弭俱屬非是著傳諭知之

丁卯

諭參贊大臣舒赫德等辦理布魯特游牧事宜

上諭軍機大臣曰舒赫德奏豐訥亨報稱布魯特人等應否准其在阿克巴什游牧臣因查閱富德所繪特穆爾圖淖爾地圖并無阿克巴什之名詢之厄魯特等云此地係布魯特納林郭勒之西山從

前準噶爾曾奪取為沙喇斯游牧似非越界隨咨
行阿桂於巡查之便再行質詢明白等語舒赫德
既查閱地圖阿克巴什原係布魯特游牧雖經準
噶爾占據而離伊犁甚遠即應以無庸辦理具奏
何必再行質詢伊乃總理回部大臣豈得自比豐
訥亨不敢徑行決斷今詢據富德奏稱阿克巴什
相離甚遠從前繪圖時即未採入等語著傳諭舒
赫德嗣後事有應行決斷者不可存推諉瞻顧之

見

諭參贊大臣阿里袞查辦搶臺賊匪等事宜

上諭軍機大臣曰阿里袞奏伊親領官兵抵阿喇古
阿斯騰阿喇圖什等處查核被害官兵及附和邁
喇木等為逆回人將官馬官駝俱行收取於布魯
特交界卡倫添設回人防範沿途曉諭安撫始回
喀什噶爾等語阿里袞此次辦理甚屬可嘉著加
恩賞給大小荷包鼻烟壺其擒獲邁喇木之索倫

領催署章京鄂勒濟圖著賞戴藍翎仍加恩授為
防禦擒獲呢雅斯之吐魯番回人瑪瑪特克勒木
除已賞藍翎外仍賞銀五十兩尋踪獲犯之索倫
領催署章京拉塔木保著賞戴藍翎吐魯番佐領
嘉杞爾著賞戴孔雀翎陣亡得傷之官兵等俱著
交部議卹至回人墨墨氏敏前聞其不肯於逆書
鈐印圖記曾諭酌量獎賞今又供稱圖記為呢雅
斯奪去難保其必無別情著再行審詢定奪邁喇

木供阿斯騰阿喇圖什等處俱曾散給逆書亦著
密查若接得時即行出首者酌量獎賞或隱匿不
舉甚至附和妄行即酌量送京及奏請正法又永
慶奏佐領羅頗里等告稱喀喇和卓將伊等搶掠
今喀喇和卓又供見羅頗里被搶助伊以口糧指
路令往烏什阿克蘇情詞互異著查訊明確不可
偏袒官兵其搶掠臺站傷害官兵之明伯克薩哈
和卓頗羅特和卓俱著嚴拏務獲以伸國憲

金
命優卹提督董孟所遺員缺以次遞補

上諭軍機大臣曰阿里袞奏稱駐劄喀什噶爾提督董孟病故殊堪憫惻應得卹典著該部議奏所遺員缺著駐劄英噶薩爾總兵楊寧補授楊寧員缺著頭等侍衛富永補授

戊辰

健銳營前鋒章京良音太以軍前効力

賜特固爾得爾巴圖魯號仍賞銀一百兩

八月癸酉

命議叙擒獲賊匪官兵回人

上諭軍機大臣曰海明等奏稱隨豐安等擒獲搶臺
賊匪奈納克和卓官兵及葉爾羌伯克等俱屬奮
勉除吐魯番藍翎侍衛阿瑞密喇卜葉爾羌商伯
克托克托和卓之子邁邁咱爾和卓阿卜都尼咱
爾俱酌賞藍翎六品頂吐魯番驍騎校阿舒爾等
酌賞布疋皮張外其奮勉効力之護軍校署章京

通吉布等開列功次具奏等語通吉布等俱著交部議叙托克托和卓亦酌量獎賞收得逆書即行呈報之伊沙噶伯克阿卜都喇伊木前已加恩獎賞仍著記名以阿奇木伯克用遇缺即補又

諭曰海明等奏請續頒獎賞翎頂已如數發往但所賞孔雀翎藍翎較之帽頂更宜慎重必實係効力行間超羣出衆者方足以示鼓勵而昭榮寵若稍能黽勉即行賞給則伊等轉視為尋常不知寶貴

矣著傳諭舒赫德等知之

乙亥

諭參贊大臣舒赫德籌議貿易物價事宜

上諭軍機大臣曰舒赫德奏內地所用銀兩攜至外
藩交易有發無收將來恐致耗散請將紬緞多為
解送較原價酌增運費則銀兩亦可漸次收回等
語所見甚是著傳諭楊應琚等籌酌辦理但所估
價值只增運費則未免太廉即如紬緞亦內地所

貴重行至外藩自當酌量物情以定價值若初次
價賤則奸商回人等私行興販徒為伊等之利著
舒赫德隨時籌畫酌量定價行之數年再為平減
亦可惟不得任商販私行攜帶減價售賣內地商
販無多亦易於稽查禁止也

丙子

命安置阿喇古阿奇木伯克察拉瑪於京師

上諭軍機大臣曰阿里衮奏阿喇古阿奇木伯克察

拉瑪之弟呢雅斯子摩羅和卓俱賊首邁喇木之
黨察拉瑪現往京師不便仍留該處等語從來叛
逆親屬俱行緣坐但察拉瑪以入覲來京或不知
情著從寬免其治罪仍留本身品級但令其居住
原處伊亦不能自安可行文沿途駐劄大臣於察
拉瑪經過時即派妥員并其家口解送來京仍將
格外加恩之處曉示察拉瑪及回衆知之

已卯

諭參贊大臣阿桂辦理嗎哈沁事宜

上諭軍機大臣曰阿桂奏稱追捕戕害德舒賊人塞卜騰和濟格爾等至塔爾巴噶台賊已經過戈壁亦未見哈薩克游牧踪跡等語此等餘孽逋逃求活前往古爾班察爾想投向俄羅斯朕昨諭阿桂來年領兵巡察額爾齊斯等處當偵探此等賊人藏匿之處以大兵掩襲不可驚散或投入俄羅斯即以不匿逃人之例曉示并云入境追捕於爾等

毫無損害若能擒獻即可回兵著傳諭知之

壬午

諭總督管甘肅巡撫吳達善暫停扣還官兵欠項

上諭軍機大臣曰前因噶隆阿奏莊浪副都統佛倫有接濟兵力及買補缺額馬匹等欠項一萬六千餘兩請展限扣還朕因陝甘各省未扣銀兩當不止莊浪一處諭令該督等查明具奏今軍機大臣會同督臣楊應琚議奏吳達善摺內查明各項未

扣銀兩俱經現在辦理佛倫所奏應俟查辦到日
請旨酌量展扣等語但該營此時恐仍照例扣還
兵力未免拮据著暫行停扣俟各案查明奏到後
再行分別降旨

癸未

諭參贊大臣阿桂查訊臺站被擒脫出兵丁

上諭軍機大臣曰據永慶奏稱伊犁察卜沁臺員報
稱收放馬匹兵丁六名夜間遇二十餘賊被擒者

四人天明脫回告稱被賊帶至特克斯河釋放等語此四人已被賊擒豈肯釋回使我知其踪跡著傳諭阿桂親往查訊若情節不實則因疎防一二嗎哈沁而妄言賊勢衆多致駭觀聽此風斷不可長即以軍法從事此等賊人諒亦不能遠颺著派伊柱領兵百餘名從伊犁至穆素爾嶺一路搜捕務期肅清臺站毋令滋擾

命侍衛永德往烏魯木齊辦事

上諭軍機大臣曰阿岱之子永德懇請在烏魯木齊
効力永德著授為頭等侍衛馳驛前往應得整裝
分例查明照數支給

訓諭喀爾喀親王桑寨多爾濟

上諭軍機大臣曰桑寨多爾濟奏喀爾喀四部落除
車臣汗暫停官差外其三部落遵旨派兵一千名
而土謝圖汗一部已派兵五百名等語朕以為三
部落佐領相等應均勻出派何致一部落即居其

半或成衮扎布因身任將軍有所偏徇今查該衙門冊籍土謝圖汗一部落即有五十六佐領扎薩克圖汗賽音諾顏二部落共五十二佐領若以按丁出派而論則尚當加增數人並無偏徇桑寨多爾濟以此陳奏甚屬非是嗣後宜痛漸此等陋習著傳諭知之

會議節省甘肅經費事宜

軍機大臣奏言前楊應琚陳奏甘省一切經費

較前減省一摺得

旨軍機大臣俟楊應琚到京時會同議奏臣等查甘
省一切經費有可不必照前辦理者如各提鎮
裁減名糧十分之一歲省銀二十三萬九千五
百餘兩各標名糧酌改馬六步四歲省七萬四
千餘兩緩購摘缺馬七千三百餘匹歲省十萬
五千三百餘兩裁撤西寧口外臺卡官兵歲省
九千七百餘兩裁汰瓜州渠道官兵歲省三千

四百六十餘兩撤回安西推莫爾圖官兵歲省
七百七十餘兩計節省銀四十三萬餘兩至安

西提標官兵今楊應琚

面奏仍遵

前旨移駐巴里坤足以聯絡哈密所有專派防兵二
千名即可全撤歲需十萬餘兩又可節省應令
該督撫等悉心妥協經理俾費不浮而事無擾
此外或可通融籌辦之處統令隨時酌量陳奏

奏入

上從之

丁亥

御前侍衛副都統安泰疏奏烏魯木齊收穫總數

安泰奏言臣於七月二十五日至烏魯木齊所
有新舊五村莊收穫之大小麥分數計足十分
粟穗正在長發向來此地少雨今仰荷

聖主鴻禧雨澤應時據屯田人等稟稱將來粟穀收

獲較麥尤豐計麥地四萬八千二百零八畝粟地三萬八千九百一十六畝俟收穫事竣再將總數具奏奏入報

聞

索倫巴圖魯二等侍衛扎延保吉林巴圖魯藍翎侍衛哈木圖虎以解送回人家口至京

命照例賞緞各八端銀各一百二十兩

戊子

命定烏魯木齊辦事章程及酌留効力人員

上諭軍機大臣曰烏魯木齊駐劄大臣及官員頗多
須將總理分辦之人區畫明晰嗣後該處一應事
務著以安泰定長永德為總辦列名具奏其餘大
臣侍衛等俱照領隊大臣例各指與一處專管之
事報知安泰等轉奏再該處滿洲綠旗官員亦覺
太多多一官則本官應得分例及跟役等行糧徒
滋糜費著傳諭安泰等於滿洲綠旗官員內効力

未久人可造就者酌量足供差遣准其留用餘俱
裁汰遣回仍將留存撤回官員列名具奏

命將自哈薩克來投之厄魯特等人口仍歸原屬安

插

上諭軍機大臣曰成袞扎布等奏從哈薩克來投之
厄魯特鄂勒推係都爾伯特剛多爾濟所屬情願
領回烏梁海塔爾巴等詢之察達克等非其所屬
亦願收領或照伊等所請或另行辦理等語從前

投來厄魯特等有遣往呼倫貝爾者因無可歸併
安插之處是以如此辦理今鄂勒推等現有人收
領又何必另行籌畫徒費資糧著傳諭成衮扎布
即照剛多爾濟察達克所請將鄂勒推塔爾巴等
領回安插嗣後有似此者俱酌照辦理

定邊左副將軍成衮扎布等疏奏哈薩克遣使

入

覲

成衮扎布奏言八月初八日巴顏珠爾克卡倫
侍衛等報稱差往哈薩克之

乾清門侍衛納旺帶領哈薩克阿布賚之弟都勒
特克勒蘇爾統宰桑巴圖魯拜顏轄和屯等入
覲俟抵烏里雅蘇台之日臣等詳加詢問護送入京
奏入報

聞

庚寅

諭參贊大臣舒赫德查核闕展解送羊隻

上諭軍機大臣曰永慶奏稱范時綬等自闕展送羊一萬三千餘隻抵阿克蘇計倒斃者五百九隻疲瘦者四百九十七隻等語內地辦送羊隻道遠不易自當視其傷損分數酌量勸懲此次所送羊隻倒斃不及一分必護送官兵等加意牧放應行議叙以示鼓勵奏內並未聲明著傳諭舒赫德查核具奏再各城駐劄蒲漢兵俱不過防守地方非進

勦可比所有屯田糧石儘足敷用現在羊隻足敷
幾月之食將來如何採買接濟著一併詳議奏聞

壬辰

諭駐劄伊犁烏魯木齊大臣等安插厄魯特等人口

事宜

上諭軍機大臣曰安泰奏稱自哈薩克來投之厄魯
特多羅克等十八名口派員送京等語準噶爾全
部蕩平哈薩克布魯特等俱經歸附從前逃往伊

等部落之厄魯特等苦其役使必有陸續來投者
或情節實有可疑及原係台吉宰桑等尚可酌量
送京若本無關係之人而每次勞費驛站甚屬無
謂著傳諭駐劄伊犁烏魯木齊大臣等嗣後本非
台吉宰桑及帶有家口而情節實無可疑者即隨
便酌量安插或令其牧放馬匹供備差遣俱可得
力不必概行送京

諭參贊大臣舒赫德等安撫自京回任之舊伯克

上諭軍機大臣曰如松等奏稱准阿里袞洛將阿喇古之阿奇木伯克察拉瑪交納世通等在庫車看守又據噶岱默特呈入覲轉回之喀什噶爾伊沙噶伯克阿卜都喇伊木噶雜納齊伯克托魁阿喇圖什伯克和扎什托古斯伯克巴伯在霍集占時即經委任今聞賊匪倡亂或生疑懼請預為防範辦理等語又詢之鄂對等據稱此次黨惡人等並無伊等子弟應將阿卜都喇伊木等交鄂對等加

意防範并密行各駐劄大臣酌量辦理等語噶岱默特心有所疑即行呈告具見悃誠但阿卜都喇伊木等係初次入覲遣回之人且邁喇木等黨與內並無伊子弟名目若以曾經霍集占委用遂疑其反覆則恐於伊等不無屈抑而回衆更生疑懼著傳諭納世通等除察拉瑪遵旨送京外即行文舒赫德明白曉示阿卜都喇伊木等云爾等係入覲之人不但未知賊匪倡亂之事即子弟等亦全

無附和者皇上已洞鑒情形與爾等無涉嗣後惟當矢心報効以期永承恩澤曉示後仍令照舊辦事并密諭噶岱默特以天朝法度惟顯犯罪惡始行懲治從不無故猜疑致有屈抑但爾誠意可嘉恩旨深為獎許俱著遵照辦理

癸巳

諭定邊左副將軍成袞扎布等查核烏里雅蘇台牧羣馬駝

上諭軍機大臣曰成袞扎布等奏烏里雅蘇台軍營
舊管新收共馬八千餘匹駝二千餘隻除支用及
倒斃外實存馬六千餘匹駝一千餘隻等語北路
軍營現在無事所用馬駝何至如許著傳諭成袞
扎布查明此項派用馬駝事畢仍交回否至收放
馬駝俱有准銷倒斃之例烏里雅蘇台為蒙古牧
廠若果實心從事自不致倒斃逾額奏內未將核
銷之處聲明亦當察看分數以定功罪可一併查

明具奏嗣後務宜揀派賢能官兵加意牧放馬駝
仍每年查奏一次

甲午

命陞賞辦理賊匪之官員兵丁及回部伯克等

上諭軍機大臣曰阿里衮奏稱此次擒獲賊犯邁喇
木等有原任道員固世衡吐魯番梅楞呼岱巴爾
氏撫慰回衆接濟追賊官兵口糧馬匹俱甚妥協
又吐魯番甲喇瑪捫克勒木查辦賊犯家產亦屬

實心効力等語固世衡著加恩開復賞給孔雀翎
仍前辦事呼岱巴爾氏等既戴獎賞孔雀翎仍賞
大緞二端又

諭曰阿里袞奏阿克蘇阿奇木伯克色梯巴勒氏從
前隨兆惠進兵甚屬勤慎此次又著有勞績著加
恩授為散秩大臣其六品都管阿本阿三辦事勤
幹六品密喇卜阿里木和卓辦事誠實請將阿里
木和卓補牌租阿巴特之阿奇木伯克阿本阿三

補授喀什噶爾之商伯克俱賞給四品頂帶著照
所請行

參贊大臣阿里袞疏奏查審賊犯分別辦理事
宜

阿里袞奏言臣於伯什克勒木等處擒獲賊犯
供出聚衆戕害官兵搶掠臺站之伯克頭目及
子弟屬人等共二百二十二名逐一研訊內哈
子伯克呢雅斯索丕等十六名尤為首惡應行

解送其附和為從之小伯克及回人共二百六
名臣照前奏將各犯在喀什噶爾正法示衆妻
子賞給額敏和卓等為奴至應解送京師之呢
雅斯索丕等十六名於七月二十三日起程再
邁喇木糾合伯什克勒木二十村莊回人拒捕
計勦殺四百八十六人擒獲一百六十七人乞
降男婦一千九十四名口現在地方空虛應請
將田園房產查明入官其舊設之哈子伯克密

喇卜明伯克三缺請行裁汰謹將查審各犯錄
供具奏奏入報

聞

命辦送伯克察拉瑪之長子喀喇和卓來京

上諭軍機大臣曰阿里衮奏稱阿喇古阿奇木伯克
察拉瑪之長子喀喇和卓聞伊弟摩羅和卓從賊
之信即行斥詈釋放卡倫兵丁接濟口糧指路令
往烏什阿克蘇等語喀喇和卓非徒無罪其居心

行事甚屬可嘉著賞戴藍翎將伊所有產業照霍
什克伯克等例變價束裝同家口護送來京隨伊
父一處安置喀什噶爾商伯克墨墨氏敏雖與邁
喇木有姻不可深信但審明始終並無附和仍不
必辦理至阿斯騰阿喇圖什之哈子莫薩和卓攜
眷在逃又初次發覺時豐安等查拏未獲之摩羅
庫圖克等數人曾否拏獲俱著舒赫德查辦並傳
諭海明等知之

乙未

乾清門侍衛納旺等疏奏傳

諭哈薩克情形

納旺等奏言臣等於五月二十七日恭奉傳

諭哈薩克阿布賚

勅書至阿布賚所居之哈勒察克圖傳

諭阿布賚敬聆

諭旨告稱我等誠心歸附豈敢糾衆搶掠烏梁海實

係巴魯克巴圖魯所為今蒙

大皇帝明鑑即傳集衆議將所掠烏梁海等送還游牧但恐數有缺少臣等語之云爾等若不隱匿何至缺少即牲畜不無費去亦應令搶掠之人賠補其巴魯克巴圖魯應如何措置阿布賚告稱至彼游牧一同酌議臣等語之云我等應將此情節遣人先行具奏爾等可派人送至交界阿布賚稱我意欲遣我族弟同送至烏魯木齊

在彼聽候并預備

貢馬九匹如蒙

恩准入覲即行趨赴或不許亦遵

旨轉回隨派族弟都勒特克勒蘇爾統等起程其巴
魯克巴圖魯作何辦理及查出烏梁海人口牲
隻酌量交還再行具奏奏入

上諭軍機大臣曰昨據成衮扎布奏侍衛納旺帶領
哈薩克使人前來今閱納旺奏是伊仍留哈薩克

今阿布賚旣遣使入覲卽飭所遣察哈爾官兵等
護送來京

戊戌

都統侍郎海明等疏奏查審賊犯分別辦理事
宜

海明等奏言喀什噶爾逆回邁喇木呢雅斯倡
亂搶掠臺站副都統公豐安等領兵拏獲逆黨
奈納克和卓等三十餘人臣等逐加研訊緣奈

納克和卓等三人接看逆書後又與本村回人
墨墨氏敏等會同兩村回人雅爾瑪瑪特等搶
掠庫勒塔里木臺站後經喀什噶爾之海蘭達
爾和卓曉示始行解散又搶掠鄂坡勒臺站之
海特瑪特呢雅斯索丕二人傳播逆書阿卜都
克勒木等即糾衆十人擒縛把總趙義等與投
宿之兵丁跟役蔡保兒俱傷重殞命其為首之
海特瑪特呢雅斯索丕及送書之多里雅特默

特等俱畏罪逃竄又鄂坡勒之小頭目摩羅庫
圖克等俱以事起倉猝不能禁止並未隨從附
和查此等逆黨俱非回部大頭目擬將奈納克
和卓凌遲處死墨墨氏敏等十人俱斬決梟示
其阿卜都克勒木等三人應照首逆凌遲處死
愛特瑪特等十七人斬決梟示海特瑪特等獲
日另結摩羅庫圖克等十人僉供並未從賊俱
行釋放其賊犯等田園房產查明入官家口賞

給額敏和卓噶岱默特等為奴其遞送逆書之
哈子阿里木據供並不識字請遞交肅州賞給
官兵奏入

上諭軍機大臣曰海明等奏審訊搶掠臺站賊犯奈
納克和卓等分別正法俱著照所請行海特瑪特
等三人毆死臺站官兵著嚴拏務獲正法以彰國
憲臺站把總趙義身為職官見賊人搶掠即當奮
往擒拏乃被其執縛毆傷殞命非陣亡可比可不

必議卹仍傳諭軍營官兵等知之又

諭曰從前辦理回人賊犯每將其家口賞給額敏和卓等但伊等同一部落屢行賞給恐無知之徒妄生議論可密諭舒赫德等不必照此辦理

諭參贊大臣舒赫德等密察素勒坦和卓等情形

上諭軍機大臣曰舒赫德奏稱英噶薩爾阿奇木伯克素勒坦和卓於途次遇解往肅州之回人沙雅瑚卜阿穆爾告稱係伊同族懇賞給領回今訪聞

素勒坦和卓係安集延人至沙雅瑚卜之父在噶
爾丹策零時係葉爾羌之阿奇木伯克阿穆爾之
祖亦係伊沙噶伯克且沙雅瑚卜曾為伊沙噶阿
穆爾亦曾為噶雜納齊並非一族體察伊二人亦
自覺與衆不同若令於葉爾羌居住恐滋事端等
語從前兆惠等據齊凌扎卜轉呈具奏給領時本
未深悉情由朕已准其賞給倘仍行取回則素勒
坦和卓必生疑懼至素勒坦和卓甫經入覲授為

阿奇木伯克亦不便併取來京此二人現無職掌設有妄動情形自可明白辦理或尚能安靜守分不過無用之人有何妨礙著傳諭舒赫德等密加體察不必遽行辦理

命解送伯克伊斯邁勒來京

上諭軍機大臣曰據納世通奏鄂對等告稱庫車之哈子伯克伊斯邁勒向回人等妄造盡行殺戮之言涕泣以告隨喚來質訊供認不諱謹看守請旨

等語伊斯邁勒造言煽惑情罪可惡著派員嚴加
看守解送來京

己亥

議選塔里雅沁回人送往呼倫貝爾屯田事宜
軍機大臣奏言副都統瑚爾起因呼倫貝爾打
牲道遠而游牧水泉充足舊曾耕種請於新降
之塔里雅沁回人內約選百名送往俾兵丁等
知引水灌溉之法等語但呼倫貝爾人等皆以

射獵為業若派遣回人屯田則恐變其舊俗請
交與將軍綽爾多相度時宜如果賞給牲畜尚
不能有益生計必須屯田應俟議奏到日再議
奏入得

旨著照瑚爾起所請行瑚爾起即以副都統為呼倫
貝爾總管令其承辦臣等恭查肅州等處賞給官
兵之回人甚多請行文陝甘總督將塔里雅沁
回人選取一百名約計五六口給車一輛送京

由兵部辦給車輛送交呼倫貝爾但回人百名
通計家口不下三百餘人一時遣至該處恐米
價轉昂請將男丁先行送往其家口暫留齊齊
哈爾候收穫後陸續遣發人給官牛一頭籽種
若干與索倫巴爾虎等通力耕作初到時官給
衣糧爨具其分莊授田按則陞科之處交該將
軍會同瑚爾起定議具奏奏入

上從之

欽定四庫全書

卷五

平定準噶爾方略續編卷五